

adnumerandas, benigne agnovisset, ita SS. quoque et OO. Regni, easdem in numerum aliarum liberarum ac Regiarum Civitatum cum competente Sessione et Voto Diaetali recipiunt, una vero, ut eadem Legibus Regni quoad omnia subjacere et sese accommodare debeant, statuitur.

*De Activitate Regii Locumtenentialis Consilii Hungarici, ad Regna Dalmatiae, Croatiae et Slavoniae extendenda.*

Articulus 58.

Consilio Regio in Regnis Dalmatiae, Croatiae et Slavoniae, per Serenissimae memoriae Reginam Apostolicam Dominam, Dominam MARIAM THERESIAM erecto, jam alioquin sublato, quemadmodum Comitatus eorundem Regnorum, omnes Politicas Inviationes a Consilio Regio Locumtenentiali Hungarico interea acceperunt, ita Sua Majestate Sacratissima benigne annuente statuitur, ut has a praelibato Consilio Regio Locumtenentiali Hungarico, praefatorum Regnorum Comitatus porro quoque accipiant, ut item tam in Gremio ejusdem Consilii, quam in Statu subalterno, ex iisdem Regnis individua in justa Proportione applicentur. Domino praeterea eorundem Regnorum Bano, dum ad illud comparere poterit, competens dignitati ejus sessio et votum assignetur, Municipalibus eadem Regna in concreto respicientibus negotiis, porro quoque in Generalibus eorundem Regnorum Congregationibus, quae cum praevio annutu Regio celebrandae venient, pertractandis.

*De Contributione Regni Croatiae et trium superioris Slavoniae Comitatum, in Diaeta Regni Hungariae pertractanda.*

Articulus 59.

Accedente quoque Benigno suae Majestatis Sacratissimae assensu conclusum est, ut deinceps Contributio Regni Croatiae et trium superioris Slavoniae Comitatum, Zagrabiensis utpote, Crisiensis et Varasdinensis, semper in Diaeta Regni Hungariae, separatim tamen a Contributione Regni Hungariae, pertractetur, neque imposterum extra Diaetam Regni Hungariae augeri possit.

*De Libera Regiaque Civitate Segniensi, a Jurisdictione Militari eximenda, complanandisque ejus Querelis.*

Articulus 60.

Ad effectum Articuli 56. An. 1741. Sua Majestas Sacratissima, intuitu Liberae Regiaeque Civitatis Segniensis, benigne addicit, se mixtam e Statu Militari et Politico Commissionem, coram qua Civitas, occupata per Statum Militarem seu Tenuta, su Beneficia edocere possit, mox finita hac Diaeta ordinaturam, nego-